



Timersorneq timigissarnerlu pillugit Inatsisartut inatsisaata allangortinneqarnera pillugu Inatsisartut inatsisissaattut siunnersuut (Nakorsaait Pissassaaitut Atorneqartarnerinut Kalaallit Nunaanni Akiuisut namminerisamik allattoqarfiat aamma E-sportip eqqarsaasersorlunilu timersornerup timersuutitut allatulli akuerineqarnerat)

(Ilinniartitaanermut, Kultureqarnermut Timersornermut Ilageeqarnermullu Naalakkersuisoq)

(Siullermeerineq)

Naalakkersuisut siunnersuuteqarnerinut qujanaq.

Timersorneq, timigissarnerlu inuunerissaarnissamut qitiulluinnarput. Timikkut peqqissuunissamut tunngaannangilaq, aammali ataatsimoornermut, atugarissaarnermut, qiimanermullu tunngassuteqarluni. Timersorneq aqcutigalugu ukiut, tunuliaquttallu akimorlugit inuit naapittarput, unamminerillu avataanni aamma sunnuteqartumik peqatigiilluarnerit pilersinneqartarlutik. Tamanna pillugu inatsisitta ineriartornermut malinnaanissaa, inuillu ullumikkut qanoq timersornissaminnik, peqatigiinnissaminnillu kissaateqarnerinut tunngavissiiinissaa aamma pingaaruteqarpoq.

Tamanna pillugu siunnersuummut matumunnga timersornermut sinaakkutinik arlalitsigut nukittorsaasumut, nutaannguisumullu Demokraatit isumalluarput.

Siullertut Nakorsaait Pissassaaitut Atorneqartarnerinut Kalaallit Nunaanni Akiuisut namminerisamik allattoqarfiannik pilersitsiniarneq ersarilluinnartumik iluaqutaassaaq. Nakorsaait pissassaaitut atorneqartarnerinut suliaqarnermut tatiginninneq aalajangiisuulluinnarpoq. Timersorneq pissassaatinik atuffiussanngilaq, soqutigisallu aporaannissaat qularineqaratik malittarisassat tutsuiginartumik atortinneqassallutik. Allattoqarfik aaqqissuussaaneermit nammineq soqutigisalimmit peerneqarluni namminerisamut inissineqarluni, tamanna innarligassaanninneq, akisussaassuseqarnerlu pillugit pingaarutilimmik ersarissumik oqariartornerussaaq. Tamanna timersortartunik, timersornerlu ataatsimut isigalugu tatiginninnermut illersueqataavoq.

Aappaattut E-sportip, eqqarsaasersorlunilu timersornerup timersuutitut allatulli akuerineqarnissaat eqqorlunilu pisariaqarpoq. Oqaatsip timersuutip imarisaa ineriartorpoq, inatsillu tassunga aamma naapertuutissalluni. Sammisat taakkua ullumikkut inuppasuarnit, minnerunngitsunik inuusuttunit sammineqarput, taakkulu unamminernik, pissuserissaarnissamik, ataatsimoornermik, ineriartornermillu malitseqarlutik.

E-sportip, eqqarsaasersorlunilu timersornerup akuerineqarnerisigut, timersornermi peqatigiinnermut amerlanerusut peqataalersinnaanissaannut ammaassissaagut. Innuttaasut timi atorlugu timersuutinut



peqataasinnaangitsut aamma ilanngullugit. Taamaalilluni akuutitsineq annertusissavarput, amerlanerusullu inuttut, eqqarsartaatsikkullu piginnaasat ineriartortinneqarlutik ataatsimoorfinni peqataanissaminnut periarfissaqarnissaat qulakkiissallutigu.

Ilutigisaanik arlaannaannut tunngassanngimmat erseqqissaatigissallugu pingaaruteqarpoq. Timersuutiniq nutaanik akuersineq timi atorlugu sammisat akigalugit pissanngilaq, ullutsinnili pissutsinut naapertuuttumik ilassutaassalluni.

Ataatsimut isigalugu siunnersuut timersornermut tatiginninnermut nukittorsaallunilu, timersornerup suusinnaaneranik paasinninnermik annertusaavoq. Tamanna pitsaasumik, siumullu isigisumik ineriartorneruvoq.

Taamatut oqaaseqarlunga Demokraatit siunnersuut tapersorsorpaat, siunnersuullu Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliami nangillugu oqaluuserineqassasoq inassutigalugu.